

**Protocol da la radunanza generala da la Corporaziun Evangelica Zernez
da marcurdi, ils 27 avrigl 2026, a las 20.00h, a Zernez**

Preschaintas sun 22 persunas cun dret da vuschar.

S-chüsats sun: s-chüsats sun: Brigitta Enkerli, Giacumin Saluz e Domenic Scandella.

Tractandas

1. Tscherna dals scrutinadurs
2. Protocol da la radunanza da preventiv dals 2 december 2025
3. Rapport annual dal president
4. Rendaquint 2025 e rapport dals revisurs da quint
5. Orientaziun davart la pravenda
6. Orientaziun e varia

Bivgnaint dal president

Hermann Thom dà il bivgnaint a las votantas ed als votants e salüda a nossa chaschiera Maria Pardeller chi preschainta hoz il rendaquint. Davo laschain intunar üna chanzun da coral, sco adüna accumpogna nossa organista Christa Pinggera il chant dals radunats al clavazin.

1. Tscherna dals scrutinadurs

Il president propuona da tscherner sco scrutinadur a Steivan Gaudenz. El vegn elet da la radunanza sainza cuntravusch.

2. Protocol da la radunanza da preventiv dals 2 december 2025

Il protocol nu vain prelet cun quai ch'el es stat expost in differents lös ed as rechatta eir sül la pagina dad internet da la corporaziun evangelica. Il protocol vain fat bun sco expost sainza cuntravusch.

3. Rapport annual dal president 2025

Il president Hermann Thom prelegia seis rapport annual e la radunanza piglia cogniziun da quel sco segua :

Rapport dal president da la raspada da Zernez pel 2025

Charas preschaintas, chars preschaints

Quist es meis setavel rapport da president da la raspada da Zernez ed avant la fusiun n'haja fat amo divers rapports da president per la uriunda raspada da Susch. Però uschè greiv a scriver ün tal rapport nu n'haja amo mai fat. Las emoziuns m'han ün pa strat in via ed in nan ed eu nu savaiva sch'eu dess plütost tadlar sün meis fö natural per m'ingaschar per la chosa o schi nun es forsa listess meglader da laschar gnir a pled quellas emoziuns chi piglian minchatant il plaschair e fan gnir ün pa stuf. Però eu prouv da rollar sü l'on da davo inavant e laschar gnir sco chi vegn.

Avant ün on vaiva gnü da preschantar ün quint cun ün deficit stramantus e davo cha nus vaivan il prüm gnü gust d'avair inchün per la pravenda, vaiva dat daplü disgusts, co chi vaiva valü la paina. Per mai e tuot il consistori significhava quai la respunsabiltà cha inschnà porta inchün cun üna gronda paja vain nus gnü da portar in nossas caricar per la grazcha dal Segner. Na ch'eu nu vess savü fingià lönch co chi'd es, ma adüna nun esa stat simpel. Cuort davo nossa

radunanza esa stat dad organisar ün arrandschamaint per tuot la regiun – la not lunga da las baselgias chi'd es gratià surtuot causa la giuventüna chi ha gnü lur festa fin aint per la not illa Tuor da la Praschun a Susch. E lura vaiva da far il plan da predgia per la stà. Per duos cults divins ün in lügl ed ün in avuost n'haja fat deschinas da telefons e tschüf be chavognas. Eu n'ha dat oura plans da predgia cun sü segns da dumonda e n'ha gnü da trar tuot ils registers per avair l'ultim inchün chi predgia. Displaschaivelmaing lura amo davant baselgias bod vödas.

In lügl vaina gnü eir ün cult divin da success grazcha a mias collegas da consistori chi han surtut l'organisaziun dal inscunter ecumenic culla Val Müstair sü Buffalora. Grazcha fich! Ed in avuost vain gnü ün viadi da seniors a Landeck d'üna bellezza cun ün nouv record da participantas e participants. Il lügl e l'avuost muossan dimena cha minchatant esa fich bel e minchatant ün schaschin.

In settember vaina lura gnü ün bel inscunter illa baselgia catolica da Susch per la festa federala da rogaziun ed in october ün viadi cun nossas confirmandas e cun lur conscolaras e lur conscolars catolics a Roma chi'd es stat per nus tuots fich instructiv, impreschiunant e fich bel.

Bellas sun stattas eir la festa da la raccolta, a Susch ed a Brail e surtuot eir la prüma dumengia d'Advent. A la dumengia dals morts vaina stuvü impizzar uschè bleras chandailas sco amo mai daspö la fusiun da nossa raspada avant 10 ons. E que adonta ch'eu n'ha fat ün grond sbagl e perfin invlidà amo duos. Eu less amo üna jada rovar per s-chüsa per meis sbagl. Davo cha l'on avant vaiva dubità schi fa sen da far quatter cults divins da Silvester, scha quels vegnan visitats minch'on da main, es quist on darcheu statta daplüssa glieud a quels ed oramai metta davart meis dubis.

Ingrazchar lessa a las duonnas chi organiseschan minch'on il di d'uraziun in favrer e plaschair han fat in marz tant, la predgia da Chalandermarz, co eir il di da schoppa, co adüna cun üna bella cumünanza ed üna buna schoppa e cun ün agüd exemplaric da nossa giuventüna. E lura natüralmaing eir la Confirmaziun, per üna vouta cun plü pacas confirmandas, ma quellas han cun sustegn dad Annette Jungen e Silvia Schlegel, fat que fich bain e fich bel.

A Pasqua vaina üna jada daplü fat il sforz dad organisar ün cult divin cun Soncha Tschaina in mincha fracziun. Tuots quatter sun stats in relaziun visitats propcha fich mal. Amo plü mal esa lura stat cha no vain gnü in Avrigl ün cult divin a Lavin, chi nun ha gnü lö causa chi d'eiran là be il ravarenda chi'd es gnü aposta aint da Tavo, l'organista e la culuostra.

Schi's guarda sün tuot l'on nun esa dimena stat be bun, ma la cumünanza ha in bels mumaints funcziunà ed i nun es neir stat tuot be mal. Que chi'd es stat pesant es chi ha d'ürant il 2025 ed eir amo aint per quist on fich blers funerals e chi nun es adüna stat simpel a pudair servir sco baselgia adequatamaing a las famiglias in led. I nun es be ch'eu stögl adüna chattar a cuorta vista ün ravarenda. Ma i douvra eir chüra d'orma e sainza ravarenda manca quella. In quel sen esa bun cha no vain uossa ün substitut chi po far quai.

Per mai il plü bel es sco adüna eir quist on statta la cumünanza, la lavur culla giuventüna sco la fin d'eivna culs preparands a Basel l'eivna passada. Bel esa eir chi dà bleras persunas chi s'ingaschan, stübgian e portan cun mai la respunsabilità. Il plü greiv es stat cha quist on causa mia sandà ed üna tscherta stanglantüm chi dà planet in quista carica, haja adüna darcheu dat mumaints ch'eu n'ha fat sbags, invlidà alch e nu sun stat bun da far la roba co ch'eu vess gnü plaschair. Eu nu sun lura svesc cuntaint culla situaziun e que secca ün toc plü ferm, co schi dà persunas malcuntaintas chi han però paca cugnuschtscha ed incletta da la chosa e fan be critica na constructiva. Eir mincha charta da persunas chi sortan da la baselgia am taintan, eir scha que es insè lur problem. Da quellas chartas haja però per furtüna dat pacas quist on.

Sco dit eu sun ün pa strat in via ed in nan tanter il plaschair da servir a la cumünanza ed il pais cha que significa. Eir scha que cun mia sandà s'imprometta dad ir oura forse amo üna jada bain, esa uschè cha a lunga vista pigliess il pais il suraman ed il plaschair gniss planet stitt – ed eu sun fich grà per la limita da temp d'uffizi.

Però i dà quels chi nu s'impon inguotta da tuot que - e que sun ils blers da quels chi sun hoz qua. Que sun tuot quels chi portan la respunsabiltà e s'ingaschan dimena mias collegas da consistori, lura tuot las collavuraturas ed ils collavuratur da la raspada quels chi fan que per paga ed quels chi fan que voluntariamaing, que sun eir tuot las ravarendas e predichants laicas e tuot ils ravarendas e predichants laics chi sun gnüts a far predgias e funarals. E que eschat eir tuot quels chi gnivat a predgia e gnivat a radunanza e gūdaivat adüna a fuormar üna bella cumünanza chi va sur tuot nossas quatter fracziuns oura. Grazcha fichun!
E grazcha per l'attenziun

Tuot la radunanza ha splattà ed as ingrazcha cun quai pro Hermann.

4. Rendaquint 2025 e rapport dals revisurs da quint

Il president dà il pled a nossa chaschiera. Maria Pardeller preschainta il quint da gestiun ed il bilantsch per l'on 2025 e declera divers detagls. La revisiun dal quint ha gnü lö als 10 marz 2026. Il quint serra cun ün suravanz d'expensas da CHF 12'937.08. Per l'on chi varà il consistori da propuoner d'augmentar las impostas per 2%, uschè cha tras l'egualisaziun da finanzas füss cuvert ün eventual deficit annual plainamaing.

Il revisur Reto Lehner prelegia il rapport dals revisurs da quint. I'l rapport es scrit cha nossa chaschiera maina la contabilità in fich bun uorden tenor las pretaisas. Il revisur da quint propuona dad approvar il quint ed eir da dar dis-charg als organs respunsabels. La radunanza segua a quella proposta sainza cuntravusch e s'ingrazcha fich pro Maria pel bun uorden e la buna collavuraziun.

5. Orientaziun davart la pravenda

Davo passa ün on cha la piazza da ravarenda es vacanta ha il consistori pudü occupar quella parzialmaing cun üna substituziun da 40%. Ravarenda Rudy van Kerckhove es pensiunà ed abita daspö duos ans cun sia duonna a Cuoir. El surpiglia a partir dal mais mai per 4 mais la substituziun cun predgias sco eir chüra d'ormas e per part funarals. El sarà per regla il mardi in nossa raspada. Il consistori spera da pudair occupar bainbod la pravenda cun ün o üna ravarenda da maniera stabla.

Duonna Anna Kirchen cumainza per a la fin da quist'on da scoula sia pensiun. Per il prossem on da scoula gūda tanter oter duonna Rahel Schreich d'instruir religiun in scoula.

Als 30 da mai invida la Regiun ecclesiastica d'Engiadina Bassa-Val Müstair a Scuol per ün di regiunal d'orgel. Il program prevezza occupaziun per uffants e giuvenils, ün referat, ün aperitiv sco eir ün concert public. Quist di es per s'ingrazchar ad organist/as chi sunan daspö decennis l'orgel in nossas baselgias, ma eir per recrutar giuvenils interessats per l'avegnir.

Il cumün ha installà ün sistem per sunar ils sains automaticamaing davent da cumün. Eir ün sistem per serrar las portas da las baselgias sur not es gnü installà.

6. Orientaziuns e varia

Il president, Hermann Thom da liber il pled suot vaira.

Letizia disch cha tuots sun cuntaints cha Margaritta es darcheu frisca ed ingrazcha ad ella per sia lavur, la radunanza conferma quai cun ün applaus. Hermann disch cha l'on chi vain sun 6 da 10 confirmands da Lavin e 4 da Zernez. Our da quel motiv daja la varianta da far eventualmaing per üna vouta la confirmaziun a Lavin.

Ottilia Godly ingrazcha a tuots chi han tut part a quista sezzüda, als collegas dal consistori, als culuosters ed organists, als ravarendas e lur agüdants e specialmaing a Hermann Thom per seis ingaschamaint. Ella til giavüscha tuot il bun per la prosma operaziun e buna sandà inavant.

Davo ün'ulteriura chanzun vain la sezzüda serrada a las 21.30 h, davo han tuot ils preschaints per finir pudü star amo da cumpagnia pro ün aperitiv.

In buna fè

L'actura Monica Schöpf